

Wääß de noch be häi em Dorf,  
merra Schubkar, Libbats Jusep koom?  
Om Tragjoch, off jera Säit en Korf,  
met su allemielijem klänzäichs Kroom.  
Imma noch hon esch dä Spruch em Kopp,  
dä dä da gesaht hot zo oose Aale.  
Bea bäi mia näist kaaft,  
dä brouch och näist se bezahle.

Wääß de noch bie et noch kä Fernseh goov,  
kä Radio, un koum en Zäirung war zor Stell  
do ging dorch dat ganze Dorf,  
dä Gemäänedena met da Schell  
Wenn dä Sunnes no dem Amt,  
on da Kerjemoua gestanne hott allän.  
hott jere Measchdorwa gläich erkannt,  
me meeße noch on dä Roodes, et ess hout Gemään.

Wääß de noch bar en Mäikäwva waa?  
un bie dä zelle deht,  
ihren em Mäi Jah fia Jah,  
omens dorch die Gäijend fleht?  
Nou fron esch desch e bessje leiser, :  
Kanns dou dä Unnaschied mia sah,  
dä zweschen em Milla un em Kaiser  
un em Schoachtebozza waa?

Wääß de noch, och dat kam ma mol sah,  
be dia fast bess en de Noocht,  
hott Klegga gespilt, un Dopp geschlah,  
ont hamgieh hott da Kääna gdoocht.  
Nou fänk net oh se laache,  
et waa jo och monechmol schie.  
Awwa su e Kleggakäilche se maache,  
grächs dou dat hout noch hie?

Wääß de noch, bie waa et oft gewäas,  
en Measchdorf off da Poat su schie.  
Koum hatt ma omens geaß,  
mooßt ma dohie schu gieh.  
Kinnt ma hout nomol dohie sesch stelle  
Egal ob Sunnes ora en da Woch,  
ma hätt su monijes se vazelle  
un Ääna dat dä de Annere froche, :

"Wääßte noch?"

Franz Börsch